

Pol-ate kaapiya la vu Pilemon

¹“Sa Pol, Yesu Kalisi-te omaaho kalaambus sa. Haay ahondoos yiy halingg Timoti kaavu kaapiyaa-jo laas vu heyate halingg anivasa hong Pilemon sen yiy ahondoos naawiing kul timuu-to, ²^bde vu hey vangaangg Apia yuuh Akipas sen haay ahondoos naayis ngaamong in kul-anjôoto, tonde vu hil bel-ate vaalu sen dasupin hôok gate bayêên-ambe ham nalohak nandôô-jaato.

³“Yate Aamangg Anutu yuuh Omaaho Bop Yesu Kalisi lambiing samu samu naas mando gaving ham-ambe ham alompayo nanjip melaas.

Pilemon ahe yoo naving Omaaho Bop

⁴“Sa kangg oo navu hong hôok lohakin, tombe sa naapêêlis nala vu Anutu in hong. ⁵In sa hango ombanyem nambe gawii-having Omaaho Bop Yesu be gahem naving yi having Anutu-te hil pin. ⁶“Yik yiy ahondoos aawii-having timu, ondeey sa naalohak in nambe Anutu bu kakook anivasa vu hong-ambe mem gale ganjak va nivasa sen yiy nako vu Kalisii-jo ni lôôt. ⁷Keen hali, gahem oo naving Anutu-te hil pin, tombe mem sil alondpayo nivasa nalak, om soo naapêêlis osin sa longgpayo ahelavis lôôt.

Pilemon gako Onisimas nom-ambe ji yi naambe hali keen

⁸Keen, saatu Kalisi-te sinaale om saalohvu nambe sa naanêêl niwêêk vu hong naambe gambiing va sen nivalok-ato. ⁹“Le ma de sa nimbaya nambe same naanêêl niwêêk e, in ahe havingin duuh hoow ahondoos lavuh ti, om yik sa kataangg hong amu. Yik sa hitata Pol sen gêên saatu Yesu Kalisi-te omaaho kalaambus having-atôônjo, ¹⁰^hom sa kataangg hong in sa noongg Onisimas, in sa nando hôok kalaambus-anjo de sa taahu yi hôok Kalisi-te banye nivasa, be mem yoo tu sa noongg. ¹¹Bôôy

^a 1:1 Ep 3:1 ^b 1:2 Kol 4:17; 2Ti 2:3 ^c 1:3 Gal 1:3 ^d 1:4 Lom 1:8-9 ^e 1:6 Pil 1:9; Kol 1:9
^f 1:7 2Ko 7:4 ^g 1:9 Plm 1 ^h 1:10 Kol 4:9; 1Ko 4:15

ond me-nahôôvu hong nivasas le, nganjo gêên-anjo mem lohvu nambe biing kul anivasas dôôvu hoow ahondoos. ¹²Om yik gêên-anjo saawiing osin sa longgpaya doos-ambe los vu hong. ¹³ⁱYik soo monaanêêl banye nivasas-to ondeey latung sa hôôk kalaambus-anjo, om saawiingin nambe aambu teenin Onisimas-ambe mando ngaaho vu sa, in nambe dukanaah gahembaan-ambe dôôvu sa de kalaambus jung na le mem. ¹⁴^jLemu nambe sa naanêêl-ambe ganjiinggis ond mem, le ma om same aavu teenin yi le, in same aawiingin nambe gaanjiihin hong e, nganjo gakam oo bu be onaanêêl naambe mando in dôôvu sa ond mem lohvu.

¹⁵Mak Anutu wiing-ambe Onisimas havuuh hong pasivdaka in nambe gale gako yi nos jesin naah-ambe mem yoo mando gaving hong danggata. ¹⁶^kOm game gangge yi naambe va malis amu jesin naah e, nganjo haale savok la, in gêên tu gate halim keen, om gahem e gaving yi. In sak saahe yi nambe sa halingg keen-ambe sahengg naving yi, om yik gahem oo le gaving yi lôôt, in gale gangge yi naambe omaaho nivasas osin Omaaho Bop-ate noow ti nambe sen hong-ato. ¹⁷De naambe gahem naving sa keen nambe hoow ahondoosin naawiing Kalisi-te kul timu, tombe sa naas ond gale gako sa jak, om Onisimas los-anja ond yik ongako yi jak naambêênja.

¹⁸Ke, naambe wiing gate vati paya, me hako gate vati, ond game gangge naambe nyevahaan neep vu yi le, nganjo gangge naambe neep vu sa. ¹⁹ⁱYik sa Pol, soo kaavu kaapiyaa-jo lak sa namangg nivalok, nambe sale aambu dôôk vaa-ja. Keen, sate nyevahaan neep vu hong in sa taahu hong hôôk Kalisi-te banye nivasas-to, lemu same naanêêl-anjo le. ²⁰Ke, hali, gambiing va nivasas vu sa lak Omaaho Bop haale, in hoow ahondoos aatu Kalisi-te omaaho, om yik goo gambiing-ambe sa longgpaya nivasas jak.

²¹Sa kangg vu nambe goo le taamuyin sate vakasin-anjo lôôt, ondeey sa kaavu kaapiyaa-jo vu hong. Yik sa lak ni lung la nambe goo le gambiing nivasas lôôt savok sen sa naanêêl vu hong-anjo na.

²²^mKe, tonde vakasin boow ti having nambe ongगतongin bayêên alopayo ti vu sa, in sa kangg vu nambe Anutu le gango hamate lohakin atombe biing-ambe saanos vu ham.

Vakasin ahus

²³ⁿKe, Epaplas sen haay ahondoos aaluus kalaambus lak Yesu Kalisi haalêê-to ond ka navu hong. ²⁴^oTonde sate hil sen hey ahondoos naawiing kul-ato, Maak ayuuh Alistakas-ande Demas, tonde Luk, ond yik sil akand navu hong having.

²⁵Yik vakasin lung laa-ja. Yate Omaaho Bop Yesu Kalisi biing yite samu samu naas mando gaving ham kanum.

ⁱ 1:13 Pil 2:30 ^j 1:14 2Ko 9:7; 1Pi 5:2 ^k 1:16 1Ti 6:2 ^l 1:19 1Ko 16:21; Gal 6:11

^m 1:22 Pil 1:25; 2:24 ⁿ 1:23 Kol 1:7 ^o 1:24 Kol 4:10,14; 2Ti 4:10-11